

## **ZAŠTO TREBAM SVOJU DJECU UPISATI U MEKTEB ?**

Navikli smo da postavljamo pitanje ZAŠTO, jer hoćemo da znamo svrshodnost, razlog i potrebu onoga što radimo. Ako možda postavljate pitanje ZAŠTO MEKTEB ili ako se možda dvoumite biste li ili ne dovodili svoje dijete u mekteb, ja vam nudimo nekoliko odgovora, koji će vam nadam se pomoći da se odlučite i odbacite svaku dilemu. Tih odgovora naravno, ima kudikamo više, a vjerujem da su i ovih nekoliko, sasvim dovoljni da u vama prevagne odluka ZA MEKTEB!

**1.** Zato što je jedna od glavnih islamskih dužnosti - svoju djecu podučiti osnovnim islamskim propisima i odgojiti ih u duhu islama. Muhammed a. s. je rekao: "Roditelj je obavezan prema djetetu: da mu da lijepo muslimansko ime, da ga lijepo odgoji, da ga poduči pismenosti, plivanju i ratnim vještinama, da ga izdržava imovinom zarađenom na dozvoljen način i da ga oženi, odnosno, ako je kćerka, uda kad dođe vrijeme za to."

**2.** Zato što hoću sebe i svoju djecu da sačuvam od džehennemske vatre koja će biti strašna kazna za one koji se ogluše o Allahove dž. š. propise. Allah dž. š. kaže u Kur'anu: "O vi koji vjerujete, sebe i svoje porodice čuvajte od vatre čije će gorivo ljudi i kamenje biti i o kojoj će se meleki strogl i snažni brinuti, koji se onome što im Allah zapovijeda neće opirati, i koji će ono što im se naredi izvršiti." (Et ? Tahrim, 6. ajet)

**3.** Zato što želim da iza sebe ostavim fino i u islamu odgojenu djecu koja će i poslije moje smrti učiti fatihu, jasin ili hatmu i upućivati dovu Allahu dž. š. svojim roditeljima za oprost. Muhammed a. s. je rekao: "Kada čovjek umre prekida se mogućnost pristizanja sevaba za dobra djela osim u 3 slučaja :

- ako je iza sebe ostavio valjano i hairli u islamu odgojeno dijete koje mu dovu čini,
- ako je ostavio trajnu sadaku - vakuf, koji i poslije njegove smrti koristi ljudima i
- znanje kojim se ljudi koriste i poslije njegove smrti."

**4.** Zato što želim da moja djeca upoznaju i zavole osnovne islamske propise, da razumiju smisao, potrebu i opravdanost tih propisa i da se naviknu da ih praktično primjenjuju. Želim da moja djeca nauče klanjati namaz, da nauče učiti Kur'an, da nauče kako će i na riječi i na djelu biti muslimani. Želim da budu sretni i ponosni što pripadaju Ummetu islama, a ne, ne daj Bože da se toga stide. Allah dž. š. kaže u Kur'anu: "Naredi čeljadi svojoj da obavlja namaz i istraj u tome. Mi ne pitamo tebe za nafaku. Mi ćemo ti nafaku osigurati! A samo one koji se Allaha budu bojali i grijeha klonili čeka lijep svršetak." (Kur'an, sura Taha, 132. ajet)

**5.** Zato što želim da moja djeca upoznaju šta im je kao muslimanima halal ? dozvoljeno, a šta haram ? zabranjeno činiti, jer će samo ako budu poštovali halal i haram biti sretni i na ovom i na budućem svijetu. Želim da nauče kakvo je zlo alkohol, droga, prostitucija, krađa, laž, sisanje smutnje, ogovaranje itd. i da se toga klone.

**6.** Zato što želim da se moja djeca druže i upoznaju sa drugom muslimanskom djecom i da se kada dođe vrijeme za to, inšaallah ožene muslimankom i udaju za muslimana. Loših primjera koji nas kao roditelje trebaju zabrinuti u ovom pogledu ima nažalost na pretek.

**7.** Zato što želim da moja djeca izgrade privrženost prema džematu i Islamskoj zajednici, prema svojoj domovini Bosni i Hercegovini, i prema svemu drugom što je napredno i humano.

**8.** Zato što sam svjestan da škole obrazuju djecu, a da ih ne odgajaju, posebno ne u islamskom duhu. Naprotiv, svjestan sam kakav štetan i razarajući uticaj na duše djece imaju mediji, društvo i sredina gdje živimo. Muhammed a. s. je rekao: "Koga , kako treba, ne odgoje roditelji, odgojiće ga vrijeme." Ja neću da odgoj svoje djece prepuštam slučaju i vremenu!

**9.** Zato što mi je jasno, da mi u nastojanju da djecu islamski odgojim i usmjerim najbolje može pomoći upravo mekteb i stručna pomoć imama - muallima.